

Melayu perlu terus memperkasa pendidikan - PM Najib
Astro Awani
Nov 27, 2016
Harits Asyraf Hasnan

KUALA LUMPUR: Bangsa Melayu perlu terus memperkasakan pendidikan sebagai teras utama bagi memastikan bangsa itu terus ke hadapan.

Menurut Perdana Menteri Datuk Seri Najib Razak kekuatan sesebuah bangsa itu terletak pada ilmu yang dimiliki.

Katanya, menerusi Dasar Pendidikan Negara serta komitmen Kerajaan dalam meningkatkan sistem pendidikan negara, ia kekal menjadi teras utama dalam agenda pembangunan negara.

"Bila kita bercakap soal kekuatan hakiki, kita tidak boleh lari daripada ilmu atau pendidikan.

"Justeru menjadi asasnya kepada GPMS yang merupakan sebuah badan yang amat tepat bila terpanggil untuk mengumpulkan segala kekuatan yang mungkin supaya dilakukan satu gerakan massa diperingkat akar umbi di kalangan pelajar-pelajar supaya timbul kesedaran," katanya menyampaikan ucapan perasmian Persidangan Agong Tahunan Gabungan Pelajar Melayu Semenanjung (GPMS) Ke-62 di ibu negara di sini hari ini.

Pada majlis sama, Perdana Menteri turut mengumumkan sumbangan RM1 juta kepada Tabung Pendidikan Pelajar Malaysia di Mesir.

Ia bagi membantu pelajar bidang perubatan, pergigian dan farmasi yang mengalami masalah tunggakan yuran di negara berkenaan.

Sumbangan itu menjadikan kutipan tabung terbabit setakat ini mencecah RM5 juta.

Pada majlis sama, bekas Perdana Menteri, Tun Abdullah Ahmad Badawi, menerima Anugerah Tokoh Gabungan Melayu Semenanjung Malaysia (GPMS) Sepanjang Zaman.

Anugerah disampaikan Perdana Menteri pada majlis yang berlangsung di Menara Dewan Bahasa dan Pustaka Kuala Lumpur.

Pada majlis itu, Abdullah yang juga Penasihat Kehormat GPMS, turut diraikan sempena ulang tahun kelahiran beliau yang ke-77 pada Sabtu.

Tag: [pendidikan](#), [pembangunan negara](#), [Perdana Menteri Datuk Seri Najib Razak](#), [Gabungan Pelajar Melayu Semenanjung](#), [GPMS](#)

© 2016 Astro Awani Network Sdn. Bhd. (535275-D) All Rights Reserved.

Source: <http://www.astroawani.com/berita-malaysia/melayu-perlu-terus-memperkasa-pendidikan-pm-najib-123954>